



Taoba Australia coach Arnold Iraq football team coach kumogo

Ceasefire benokra Ukraine dangi hadir balala yokba anena atatsüla: Peskov

Pakistan-i ceasefire alema inyaker

Jammu, May 10, 2025 (Agencies): Pakistan aser India tsüngda ceasefire alitsü nangzüktepba sülen ghonda ishika dang lir Pakistan-i ceasefire agreement alema inyakogo.

International Border aser Jammu and Kashmir kubok Line of Control (LoC) aser Punjab o Rajasthan nung Pakistan-i ceasefire alema inyak.

Iba atema Border Security Force (BSF) nem ceasefire alema inyaksangshiba anema inyaksü tashi ajunga agütsüogo.

Linük ana tsüngda ceasefire agreement ka agiogo ta India-i

sangoktsüba sülen mapang tatsüka lir Pakistan-i ceasefire alema inyaksü tenzük.

Srinagar nung bomb aika apokba ola angashia liasü aser red alert sangdongba den iba tesem nung blackout asü. maneni, Rajasthan kubok Pokhran aser Kashmir kubok Baramulla nung drones khazüka yokogo.

Pakistan Army-i Akhnoor, Rajouri, aser RS Pura sectors nung aliba International Border nung artillery shelling asü. Jammu nunga Palanwalla sector nung Line of Control (LoC) anasa ceasefire alema inyakba osang lir.

AKTD-i "Excellency Award" agütsü

Dimapur, May 10, 2025 (TYO): May 10, 2025 nü Ao Kaketshir Telungjem Dimapur 47 buba Inty Mungdang aser 16 buba Takoker Tushiba Sentong agiogo.

Iba sentong ya Senden Riju, Purana Bazar nung ayongzüka agi aser Dimapur nung AKTD kubok kaketshir unit ajak nungi züngsemtem adenshia amung.

Iba sentong nung tongti o jembirji Architect Richard Belho, Chairman Zynorique Initiative Society liasü aser pai "Sustainable Entrepreneurship and its Economy" onük jembi.

"Naga yimten tebilemtsü metembangtetba ajanga Naga nungeri shishilembabaren wadang nung timtem ajurur saka lanurtemi sorkar mapa dak dang teimla meyui entrepreneurship wadang nung ajemoktsüla kechiyong sorkar mapa ajanga financial security magütsür" ta Richard Belho-i ashi.

"Tsüngremi asenok nem ali tajung moaja lir aser asen rongsen tulutibaji iba ya lir. Alima nung Nagaland ya bio-diversity hotspot ka lir aser süngdonglidong o chiyungtsü tapu balala min nung angur. Anungji asenoki bio-diversity nung temulung agütsütsüla" ta paisa kaketshirtem ayongzü.

Naga nunger sasep nung sen amshiba ajanga dang asenoki rongsenketzüng nung talenba kecha maliba tensa ajurutsü, anungji asenoki tangalen nungi bener arua shishilembaba masü saka asenoki tangar den aseni yanglutetba/züsentetba shishilembatsüla. Yamaji asü nung dang tangar keti sen maotsü saka Nagaland telung nung sen amshi tenzüksü aser iba ajanga asenoki economic sovereignty angutsü ta Belho-isa kaketshirtem ayongzü.

Iba sentong nung EDABC Pastor Rev. Jongpong Imsong-i temoatsü meshia sarasadem, AKTD Tir Imnatemsu-i tesentepertem pelaa agizük aser AKM Tir Lanutoshi Aier-i salem

osang aben. Sentong nungsa Sp. Toshiwati-i ken ka aten aser AKTD Shisaliok & Nütsüngsük Tezülur Kr. Imtinaro T Longkumer-i "Excellency Award" ketdangsüa agütsü.

2023 HSLC Toppers (no HSSLC toppers)

Top 10 (i) **Mulungsula Changkiri**

Fathers Name- Limatemsi Changkiri

Village: Changki

School- Holy Cross Hr. Secondary School Dimapur

Top 15 (v) **Imtitongzuk**

Fathers Name- Ungerchang

Village- Dibuia

School- Christina Memorial Higher Secondary School Dimapur

Top 17 (i) **Rongsenungla Longchar**

D/o W. Senti Longchar

Village- Chungtia

School- Saint Paul Hr Sec School

2024 HSLC Toppers

Top 10(c) **Suyaben Longkumer**

d/o Nungshipokba Longkumer

(Ungma)

Holy Cross Hr. Sec. School

Top 17(e) **Imkongsenla Longkumer**

d/o Moatoshi Longkumer (Changtongya),

Little Star Hr. Sec. School,

Top 14(g) **Tiainla** d/o Lt. Akumpong Longchar (Dibuia),

St Mary Hr. Sec School

Padumpukhuri

Top 20 (I) **Temsujungba** s/o Imlitemjen Walling (Khar), Lima

Aier Hr. Sec. School

HSSLC Commerce-

Top 8 **Imemebo Ozukum** s/o Tulutoshi Ozukum (Mongsenyimti),

Holy Cross Hr. Sec School,

HSSLC Science

Top 7(a) **Temjenlemla Longkumer** d/o Dr. Moyajungshi Lkr (Longsa), Little Star Higher Secondary School,

AKTD Mendenpur tasentem: Imnatemsu Pongen - Tir Yashikaba Aier - Tatong Tir Tongpangnichet - Tongti Tezülur Imliakum Pongen - Repsem Zülur

Nagaland nung alirtemi Armed Forces aser linük tanishirtem pusemer

Dimapur, May 10, 2025 (TYO): Indian Armed Forces aser linük tanishirtem pusema nungittsü aser national security atema inyaksü nangzükshitsü atema Nagaland Governor La Ganesan aser Chief Minister Dr. Neiphiu Rio nati May 10, 2025 nü senden ka ayonga menogo.

Iba senden nung state sorkar nungi tongti ketdangsürtem, security forces ketdangsürtem aser Nagaland nung tamangba yimsü aser lokti lennirtem aden.

Indian Armed Forces-i Pakistan aser Pakistan Occupied Kashmir (PoK) nung kiralongartem amakba ya linük kümzüka ayuba mapa ka lir aser Nagaland nung sensotemi pusema nungiter ta tanü senden nung bangiemtep.

"India sensotem ama Nagaland nung alirtemi Armed Forces aser Prime Minister



Narendra Modi lenisüba kubok national leadership pusemer aser külemi noktaker. Asen sepaitemi lendong ajak nungi asen linük kümzüka ayutsü atema tasü itta aser bendanga agüja inyakba atema tenüngsang agütsür" ta Dr. Neiphiu Rio aser La Ganesan nati sign asüba bangzüng nung shia lir.

Iba senden nung adenertemisa tamangba yimsü lennir ajak dang Nagaland ajungalen sepaitem, national leaders aser linük asoshi

sarasadem sentongtem ayonga agitsü metetdaksüogo.

Parnokisa Nagaland nung alirtem dang taila osang, telemsa adoktsüba osangtsüsang aser linük anemertemi prokshiba osangtem nungi kümdanga alitsü mepishia metetdaksüogo.

Nübertemi official government aser military channels ajanga prokshiba osang dak dang amangtsüla aser kuli tejangja metetba sülen ang prokshitsüla ta parnokisa metetdaksü.

Chakhesang kaketshirtemi NHIDCL & Contractor anema lungkak ait



Kohima, May 10, 2025 (TYO): Chakhesang Students' Union (CSU)-i Honibarnü National Highways and Infrastructure Development Corporation Limited (NHIDCL) aser EPC Contractor M/s Ratna Infrastructure Project Pvt. Ltd. anema lungkak aitba sentong ayongzüka agiogo.

NHIDCL aser EPC Contractor ajanga two-lane National Highway Kohima-Jessami Road (Package 2) mapang shitak nung meyangluba aser anepalu masüba atema CSU-i iba sentong ayonga agi.

Phek district kubok Kikruma Village nung CSU-i sentong ayonga agi aser iba nung Northern Kikruma, kaketshirtem, lanurtem aser yimdaklirtemi shilem agia nungit.

Package-2 stretch nung Kikruma village kubok kilometer 29 kongshir.

Tanü lungkak aitertemi "Enough is enough - Your failure

is unacceptable", "Our road our future - M/s Ratna Infra. Pvt. Lmt. En ough of your fake excuses", "NHIDCL deliver quality not delays", "Your inaction is our daily risk", "Build once built right", "Broken roads, broken trust" amala tezülubatam amer lungkak ait.

"CSU-i lungkak aitba mezüngbuba shilem nung yaküm October ita NHIDCL Office Pfutsero shibangtsü. Iba sülen shidi aika agüja aru aser May 2 nü anogo tenet züngzüksü saka Package-2 nung lenmang mejungi aliba yanglushiba kecha majitet" ta CSU president Pfhulo Sara-isa ashi.

Iba tongtipang lenmang nung mapa meinyaker aser tzüngluruwa tonga arur aser lenmang tamajungba akümtsü. Bangdakpurtemi senzuka yutsüba aser tebilemtsü mabenba aitsür, ta pai ashi.

October 10, 2023 nü NH29 Package 2 ya M/s Ratna nem

lemzüksü aser January 5, 2024 nungi mapa tenzük, saka tang tashi Package 2 stretch nung mapa inyakba majiteter. Iba atema CSU-i aiben shiditem zülüogo saka telangzüba kecha manguba agi yimdong nung lungkak aittsüsa akümer ta Pfhulo Sara-isa metetdaksü.

May 2, 2025 nü CSU-i NHIDCL nem mapang züngzüksü aser iba nung potholes, clear road blockages, provide drainage, &v mitigate road fall dena liasü.

Iba lenmang ya Kikruma nunger mesüra Phek district nung alirtem atema dang masü saka Meluri aser Kiphire district tem nung alir asoshia kanga tongtipang lir ta CSU president-isa ashi.

CSU-i bangdakpurtem dang machinery peria bener arutsü aser tekaratiba nung mapa inyaktertem anir arua lenmang yanglutsü takhangba agütsüogo.

Kohima Longsa Senso Telongjem Hon Jubilee mungogo



Mejeta jaoker MLA A. Nyamnei Konyak aser Mr. Benei M. Lamthiu, Member of Parliament (Lok Sabha) Mr. S. Supongmeren Jamir nunger den ketdangpurtem aser Kohima Longsa Senso Telongjem züngsem tem tangokba noksa nung angur.

Dimapur, Monupii/May 10 (TYO): Kohima Longsa Senso Telongjem (Kohima Longsa Union) Hon Jubilee mung May 10 nü Capital Convention Centre, Kohima nung mungogo. Iba sentong ya "Towards Wider Horizons" omen nung ajemdaker agia liasü.

Sentong nung Nagaland Legislative Assembly züngsem aser Longsa nung anükapang A. Nyamnei Konyak aser Benei M. Lamthiu na mejeta jaoker liasü.

Sentong ya ketdangpurtem Inisüba nung agi aser Jubile lapoba sentong Longsa Kaketshir Telongjem (Students)-i agi, kong jubilee atema mejeta mejemba ken ka aten aser Union indang puti otsü metetdakja liasü. Sentong

tetenzüki küm 25 ajungba mapang renema toktsüba time capsule ka lapok aser Kohima Ao Baptist Arogo senior pastor Rev, Sentisashi Aier-i Tsüngrem temaotsü meshizüka sarasadema liasü. Lokti pela agizükba o Union tir Lanuakum Jamir-i jembia liasü.

Jubilee sentong nungsa Member of Parliament (Lok Sabha) S. Süpongmeren Jamir-ia shilem agi, shibai tajungshi o tatsüka jembia liasü. Kohima Ao Telongjem aser Kohima Ongpangkong Telongjem den Longsa Village Council Chairman nungeria o tatsütsü jembia liasü.

Kasa mapang nung Union indang Takamanan Jamir-i lemsatep. Pai Union tentetba nung küm 50 ajungba indang lemsatep. Sentong nungsa

Longsa Ao Süngküm Zünga, Kohima-i jubilee nüngdem nung ken tajung ka aten.

Sentong nung o jembiba mapang mejeta jaokeri parnoka Longsa nung ama dang bilemba lemsatepba den nüburtan dang maneni apu alar kaka akümtsü aser tejen tesendakteptem akangshitsü ajungshia liasü.

Maneni sentong nung omen "Towards wider Horizons" dak ajemdaker taoba Chief Secretary, Mr. Alemtemshi Jamir-i o jembia liasü.

Bangzüng committee convener Dr. S. Rongsen Longkumer-i, Jubilee bangzüng zünga metetdaksü aser Jubilee Planning Committee convener Merentoshi R. Jamir-i tepela o jembia liasü.

United Naga Democratic Party-i asükhu lemsatep

Dimapur, Monupii/May 10 (TYO): Nationalist Democratic Progressive Party (NDPP) tir Chingwang Konyak kinungtsü Nokpangmenla asüba osang angazüka mang ayimba United Naga Democratic Party (UNDP)-i sangdong ka ajanga lemsatepogo.

Mangyim jashi tia nung

aliba mapang UNDP pur Chingwang Konyak aser par kinungertem den nokdaka lir, ta kasa sangdong ajanga ashi.

Asür Nokpangmenla ya anepasa aketba aser tashi tait tetsür ka liasü, shibai la meketa alirtem ajak ajungmesoa liasü. La asüba ya lar kibong asoshi dang masü saka la meteta alirtem ajak atema takoksa lir.

Mangyimjashi tia nung aliba mapang tulusang Tsüngremi Chingwang Konyak aser par kinungertem nem anisüngzük agüjang ta, aser asür tanüla teti tatem makadak anisüngzükdkang ta sarasademtsür, ta United Naga Democratic Party General Secretary A Shyerhunlo Lorin-i sangdong ka ajanga metetdaksü.

"The Lotha Naga Customary Law, Practices & Attires" kakat sayaogo



Dimapur, Monupii/May 10 (TYO): "The Lotha Naga Customary Law, Practices & Attires" ta nüngja agütsür P. Pius Lotha-i züluba kakat ka May 10 nü Dr. Imkongliba Ao Hall, Raj Bhavan, Kohima nung sayaogo.

Iba sentong nung Nagaland Angh La Ganesan alakteta jaoker liasü aser pai kakat ya sayaja liasü. Pai kakat züluri bendanga agüja inyakba atema pa nem tenügsang agütsü.

Sentong nung o jembiba mapang Angh-i iba sentong nung densemba atema pelaba lemsatep aser ashiba agi iba

kakat sayaba ya literary sentong ka dang masü saka Lotha nung taremzü tanüla atema tetushi ka aser ajak senteper sobaliba wazüka ayutsü atema tayongzükba ka ta ashi.

Anghisa, Pius Lotha nem pa mapa tajung asoshi tenügsang agütsüba den iba kakat ya shisatsü aika aketba kakat ka koba ajanga Lotha nung sobaliba, yimden yimsüsüba, kibong, sobaliba temzüng ozüngtem aser sobosolemtsü indang tangazükba agütsür, ta ashi.

Iba sentong nung Lotha nung lenirtem, sorkar tenzükertem aser tepela lemsatepertemi shilem agia liasü.

Kohima Lotha Hoho mendenbuba K.N Mhonthung Lotha lenisüba nung iba sentong ya agi aser pai P. Pius Lotha-i züluba kakat okila metetdakja liasü. Sentong nungsa Achumbemo Kikon, MLA & Chairperson, NLA Committee on Climate Change and Environment-i o tatsüka jembia aser Treasurer, Kohima Lotha Hoho Jonas Yanthan-i tepela anküp o jembia liasü.

Dimapur nung mejangjabatsü mang kanguteta lir

Dimapur, Monupii/May 10 (TYO): : May 9 nü 1900 hrs meta Burma Camp (Narcol turning point), Dimapur nung tetsür chanu ka sür aliba indang phone ajanga East Police Station nem metetdakja liasü.

Osang dak ajemdaker PS duty party iba tesemi ao aser Bangjak Phom colony, Dimapur nung anogotzübo ka nung tanur tetsür chanu ka wool sü temerem agi aleper aliba nguteta liasü.

Tasü mang ya shiatoker liasü. Iba dak ajemdaker tenük

kuli agütsürtem matsü ngandang bushisü ngandang liasü.

Temzüng ozü ng dak ajemdaker ken o ajak tembanga inyakba sülen tasü mang ya PM examination/identification atema District Hospital Dimapur Morgue-i benerogo.

Asüla yagi tola temesü ng semer liasü aser la teberem nung süngzü tanak mesür liasü.

Asür kinunger tem dang Officer-in-Charge, Women PS Dimapur (Contact No.7085055027) den

tongteprateptsü mepeshia metetdaksü ngo.

Kohima nung Taho Bikers Ride sentong agiogo



DC Kohima B Henok Buchem-i NPSC Office Kohima anasa Taho Bikers Ride tenzüksüba noksa nung angur.

Dimapur, Monupii/May 10 (TYO): May 10 nü "Ride Safe, Ride Smart, Wear a Helmet" omen nung ajemdaker Kohima nung Taho Bikers Ride sentong ayongzük agiogo. Iba sentong ya Taho aser Axor and Vega na longjemer ayongzük agia liasü.

Sentong tenzüksüba mapang Deputy Commissioner of Kohima, B. Henok Buchem, NCS-i, iba sentong pusemba lemsatepba liasü. Iba sentong nung densemba atema pelaba lemsatepba mapang pai, bike sentong ka nungbo bike anishiba nung shilem agitsü imla ataba lemsatepba liasü.

Paisa, sentong nung shilem agirtem dang kümdang anishitsü aser sentong tajung ayongzükba atema tenügsang agütsüba den kümzüka alitsü atema helmet shitak shimtsü nüngdakba lemsatepba liasü.

Sentong nung Vega Auto Accessories Regional Manager Saddam-ia o tatsü ka jembia aser pai sentong nung shilem agirtem dang road safety indang jangja alitsü aser traffic rules sülen tashi anga anidaksü ajungshia liasü.

Sentong nung biker 80 shi-i shilem agi, koba NPSC Office, L. Khel nung tenzü aser Naga Heritage Village, Kisama nung tembanga liasü.

NCSU Tseminyu District Unit Office semzü kogo

Dimapur, Monupii/May 10 (TYO): Nagaland Contractor's & Supplier's Union (NCSU) Tseminyu District Unit Office May 9 nü NCSU Head Office Kohima Nagaland tir Pele Khezhie-i Rengma Hoho tir Tesinlo Semy matsü ngandang semzüksü ngo.

Iba sentong ya Aba Khing, General Secretary NCSU Tseminyu District Unit lenisüba nung agi aser tir M.S. Khing-i lokti pela agizükba o jembia liasü. Sentong nungsa bendanga agütsü sarasadem Tseminyu Town Baptist Church pastor Yhunthonglo Khing-i agi aser tatong tir Hyunsi Thyü-gi tepela o jembia liasü.

Iba sentong nung NCSU tir Pele Khezhie tetushi tejaoker liasü, shiba jila teyong nung Union Office amenokba atema Tseminyu District Unit nem tenügsang agüja liasü.

Tir-isa, züngsemtem dang linük yangerba aser talisa Tseminyu amala district tasen yangerba nung yakyaka shilem agitsü ajungshi. Paisa,

züngsemtem dang table tenders anema nokdaksü ajungshi, koba sorkar inyakyim anema lir, ta ashi

Paisa, NCSU kijai Nagaland nung district ajak ayimjemer aser tanü tashi nung Union nung züngsem 5000 dak tema züngoksemogo aser züngsem 2000 dak temabo Class-1 contractors tem lir ta ashi.

Kasa mapang nung Rengma Hoho tir Tesinlo Semy, shiba Union advisor lir, pai züngsemtem dang Tseminyu jila ajungkettsü ajungshi, koba tangar meneptsü talang ka lir, ta ashi. Paisa, teka amteper inyatsü tenangzükba agütsü, kechiyong Tseminyu jila yanglutsü ya pa pungmang lir, ta shisem.

Sentong nung Tseminyu Town Council mendenbula Ruth Rengma, Asao Seb SDEO, Rengma Youth Organisation aser yimtsü yimbotemi shilem agia liasü.

Sentong ya NCSU Tseminyu District Unit-i renemtsüba chiyongtsü chiyongba sülen tembanga liasü.



May 10, 2025 nü New Delhi nung 'Operation Sindoor' dak sendakba nung Foreign Secretary Vikram Misri den IAF officer Wing Commander Vyomika Singh aser Army Colonel Sofiya Qureshi nungeri osangbenertem den jembidang tangokba noksa nung angur.

Tarutsü nung kiralongraba ajak rara ayongba amazungshitsü: India

New Delhi, Monupii/May 10 (Agencies): Honibarnü India-i Pakistan dang, tarutsü nung India anema kiralongrara ibaji rara ayongba ama züngshitsü aser tapet inyaktsü, ta metetdaksü.

Honibarnü Ato kilonser Narendra Modi leniba nung security dak sendakba senden ka amenba sülen India-i iba osang ya metetdaksü.

Ato kilonser Modi'er kidang ayongzükba senden nungji Defence Minister Rajnath Singh, National Security Advisor Ajit Doval, Chief of Defence Staff (CDS) General Anil Chauhan, Chief of Army Staff (COAS) General Upendra Dwivedi, Chief of

Naval Staff (CNS) Admiral Dinesh K Tripathi aser Chief of the Air Staff (CAS) Air Chief Marshal AP Singh nunger aden.

Pakistan-i India nung tesem 26 amakba sülen Honibarnep India-i Pakistan telung nung airbase pezü amak.

Osangbenertem den jembidang Indian Army Colonel Sofiya Qureshi-i, "India nunger raraba tayimtsü nungi yokba hadir amshia Rafiqui, Murid, Chaklala, Rahim Yar Khan, Sukkur aser Chunian nung Pakistan military base amak aser Pasrur den Sialkot aviation bases nung radar bases amak," ta metetdaksü.

Honibarnep züngia 1:40 ako

meta Pakistan-i high-speed missiles amshia Punjab nung aliba airbase station amakba den külemi Srinagar, Awantipora aser Udampur nung aliba hospitals aser schools densema kiojentem amak.

Osangbenertem den jembidang Foreign Secretary Vikram Misri-i, "Pakistan nunger inyakyimji jashidaktsütsü aser tensa tamajungba kümdaktsütsü atema liasü. Udampur, Pathankot, Adampur, Bhuj aser Bathinda nung airbase raksa aser sepaitem-a kar yiruba osang lir," ta metetdaksü.

Honibarnüa Pakistan arrtsülen nungi shells aser injang sashia yoka liasü.

India aser Pakistan nati rara anentsü atema telemtetba agi

New Delhi, May 10 (Agencies): Tesüiba anogo pezünü tashi arrtsülen injang sashia yokba den külemi drones amshiba sülen Honibarnü India aser Pakistan nati tangsa rara anena atatsü melungtepogo, ta Foreign Secretary Vikram Misri-i metetdaksü.

Misri-i, Honibar nikongdang 5:00 ako nungi tenzuka linük anapronglai ali, anüng aser tzüyim nung injang yokba anentsü telemtetba agiogo, ta metetdaksü.

Foreign Secretary Vikram Misri-i, "Tanü nikongdang 3:35 ako meta Pakistan Directors General of Military Operations (DGMO)-i Indian DGMO dangi phone süa jembiogo. Tenati nikongdang 5:00 ako

nungi ali, anüng aser tzüyim nung injang yokba aser sepaitem inyaksangshi ajak anentsü melungtep. Directors General of Military Operations-i maneni May 12 anogo nung 12:00 ako nung jembitsü," ta metetdaksü.

External Affairs Minister Dr S Jaishankar-ia, "Tanü India aser Pakistan nati injang yokba anentsü atema tangatettep ka dangi aruogo. India-i mapang ajak nung kiralongra anema inyaker, aser maneni inyaktsü," ta metetdaksü.

MEA-i iba sangdong magütsüdangyongi US Tir Donald Trump-i, India aser Pakistan na tsüngda rara anentsü atema US-i tiyongtsüi ia inyak, ta metetdakja liasü.

Truth Social ajanga Donald Trump-i, India aser Pakistan na tsüngda rara anentsü bangjemogo, ta metetdakja liasü.

Iba dak alia US Secretary of State Marco Rubio-ia US-i tiyongtsüi ia inyakba ajanga linük anati rara anentsü melungtepogo, ta metetdaksü.

April 22 nü kiralongrartemi Pahalgam nung India nunger 26 khasetba sülen anogo 14 lir India sepaitemi Operation Sindoor kübok Pakistan aser Pakistan-occupied Kashmir nung kiralongrartem camp 9 amak. Iba sülen Pakistan-i anogo aika Line of Control nung shells aser injang maneni yokba ajanga Jammu & Kashmir nung nisung 16 süogo.



May 10, 2025 nü New Delhi nung Ato kilonser Narendra Modi leniba nung Union Defence Minister Rajnath Singh, National Security Advisor (NSA) Ajit Doval, Chief of Defence Staff (CDS) General Anil Chauhan, Chief of Army Staff (COAS) General Upendra Dwivedi, Chief of Naval Staff (CNS) Admiral Dinesh K Tripathi aser Chief of the Air Staff (CAS) Air Chief Marshal AP Singh nunger senden amendang tangokba noksa nung angur.

Tzüngluruwa mongpu May 27 nü Kerala nung tenzüktsü: IMD

New Delhi, May 10 (Agencies): Taküm tzüngluruwa mongpu May 27 nü Kerala nung tenzüktsü, aser ibaji anogo pongu jelia tenzüker asütsü, ta Honibarnü IMD-i metetdaksü.

Teti agia tzüngluruwa mongpu ya June 1 nü tenzüker.

Anogo ishika jelia tzüngluruwa mongpu tenzükba ajanga mei mapang metsüh yokba Kharif tsünusempongtsü jelia yoktsü, aser tzüngluruwa mongpu jelia asadangtetba ajanga aluyimertem renemshiba nung yaritsü.

India nung tzüngluruwa

mongpu Kerala nung June 1 nü tenzüker aser July 8 tashi nungbo linük tesem ajak ayimjemer.

2005 küm nungi tenzuka IMD-i Kerala nung tzüngluruwa mongpu tenzüktsü anogo jelia sangdonger.

2015 küm dak alaka tesüiba küm 20 tashi (2005 nungi 2024) IMD-i Kerala nung tzüngluruwa mongpu tenzüktsü anogo shidak dang takzüteta aruogo. 2015 küm nung IMD-i tzüngluruwa mongpu May 30 nü tenzüktsü, ta asadangteta liasü ajisüaka anogo ishika lir June 5 nü ang tzüngluruwa mongpu tenzuka liasü.



Poonch, May 10, 2025: Jammu & Kashmir nung Poonch district kübok Behra yimdak Pakistan nunger shells ajanga poksatsüba ki ka telung nung tambur ka aliba noksa nung angur.

Congress-i party ajak senden ayongtsü akhanger

New Delhi, May 10 (Agencies): India aser Pakistan nati rara anentsü melungtepogo, anungji Ato kilonser Narendra Modi-i party ajak senden ka ayongzüktsüla aser telemtetba agiba nung yimtenren party tem anioktsüla, ta Congress-i metetdaksü.

Congress-isa, tesüiba anogo 18 tsüngda tatalokbatem nung ajemdaker o lemteptsü atema sorkari temeja Parliament senden ka ayongzüktsüla, ta takhangba agütsü.

Congress general secretary in-charge communications, Jairam Ramesh-i X ajanga, "Washington DC nungi

sangdong agütsüba sülen Ato kilonseri party ajak senden ka ayongzüktsüji tanga mapang dang nungi tang tenüngdakba, iba denji külemi telemtetba agiba nung yimtenren party tem nem shilem agidaktsütsüla," ta metetdaksü.

"Iba dak alia tesüiba anogo 18 tsüngda tatalokbatem nung ajemdaker o lemteptsü atema temeja Parliament senden ka ayongzüktsüji tanga mapang dang nungi tang tenüngdakba. Kiralongrartemi Pahalgam amakba nungi tenzuka tarutsü atema jembiba den külemi longjemer telemtetba agiba sayutsüla," ta paisa metetdaksü.

Army tem senzüsempongba video prokba atema nisung ka apu

Jaisalmer, Monupii/May 10 (Agencies): Army tem senzüsempongba indang video ka tangokba sülen social media nung prokshiba atema Hokolbar aonung Rajasthan state kübok Barmer nung police-i nisung ka puogo.

Police-i ashiba agi, special cyber patrolling den külemi surveillance campaign agidar aser iba dak sendakba nung sepaitem senzüsempongba video ka tangokba prokshiba atema nisungbaji apu.

Surveillance campaign agibaji India sorkari sepaitem inyaksangshiba noksa mesüra videos kecha social media nung meproksü atema tuyuba mapa küma benoktsü atema inyaker. Balotra district kübok Gida Halka nung alir arrshi küm 22, Jiyaram-i army tem senzüsempongba video ka tangokba sülen social media

nung prokba agi police team kati Bharatiya Nagrik Suraksha Sanhita kübok Arrla 170 nung ajemdaker pa apu.

Iba Arrla kübok police-i magistrate nungi 'warrant' mesüra tetuyuba meliaka police-i aibelener aputsü koka lir.

Tang India aser Pakistan na tsüngda tensa mejungi aliba mapang nung Barmer police-i nüburtem dang sepaitem senzüsempongba noksa mesüra video kecha social media nung meproksütsü, aser iba tetuyuba alema inyakerem mita reprangtsü tuyua liasü.

Pakistan-i drones ajanga itdangitba tesemtem rongnung Barmer densema liasü. Hokolbar aonung iba district tesem ajak nung tesangwa shibanga liasü aser administration-ia nüburtem dang kidang nungi ayazüka maotsü tekümdangtsü metetdakja liasü.



TIR YIMYIM

YIMOBILEM (EDITORIAL)

DIMAPUR SUNDAY, MAY (MONUPII) 11, 2025

Ojala dak aliba tashi

Ojala dak aliba temeim dang masü saka la dak aketba tashiji kecha tashi dena medemdangtsü makok. Iba tashi jagi Tsüngrem mulunga koka jembir. Hannah taginüba ajunga agi lar chir asütsüsa tanur ka aginüba liasü. Atangji, lai tanur mesotsüaka, la kinüngoiboi la kanga meim, ajisüaka la dak tanur maliba agi la mepelateti liasü. Hannah tanur masoba timtemji Laishibai mashir, saka lai iba tebilemtsüji Tsüngrem dang ola madoki kanga kukua ajep. Iba ama teimla makaba jenjang ka nung, ashiko, tetsür aikati Tsüngrem dang jala asüyonga, jabaso asüyonga mashi ka danga moajang ta meshitsü südi. Ajisüaka, Hannah-ibo indang-indanger Tsüngrem dang jabaso ka meshi. Hannah Tsüngrem dang yamai sarasadem, "Oh, Tulusang Kibuba, nai atangji nü kilitsür ala-ashia timtemba tia ya reprangra aser ni bilemtetra aser nü kilitsür mamara aser nür kilitsür nem jabaso ka agütsüra, pa taküm arishi anogo ajak Kibuba nem ni agütsütsü, aser pa kolak nung kusünok kodanga mataloktsü." Iba sarasadem olaji Tulusang Kibubai langzü aser Hannah aser la kinüngoiboi Elkana nem jabaso ka moatsü aser lai iba jabaso tenüng Samuel ta aja.. Samuel tetezü, ni pa Kibuba dang meshizük ta 1 Samuel 1:20 nung shia angutsü. Kibuba Tsüngrem nungi jabaso ka meshizüktettsüsa tashi aliba tetsüji atamata masü. Aji oda, Tsüngremi Hannah bilemtettsüsa lai litetba tashi aser lai aginüba ka Tsüngrem dang nungi meshizüktettsüsa sarasademba tashiji kanga tulu lir. Aji oda, ano ojala dak aliba tashi ka 1 Samuel 25 nung otsü ka angur. Ibaji shisataka, tagütsünü aser temeim aketba Abigail. Lar ya takar saka la kinüngoiboi Nabal majungba agi aiben laiang kibong khuret abenba asenoki lar kibong otsü nungi angatettsü. David Saul chuba nungi jenshia arem nung senzüdang, pa den par sülen anidakertemi Nabaler san aser sanükertem timtem lendong aika nungi yaria kümzük. Iba osang denji külemi David-i Nabal dangi parnok atema chiyongtsü meshia pa sülen anidaker asangur ter yok. Atangji, Davider teloki yaribaji Nabaler sannükertem jagi meteta liasü Ajisüaka, parnok dang pelaba temaitsü sayua David nungdakba dang nungi teimba aser tuluba yoktsü melen, Nabal-i David kanga mezügmeshia jembir pai tenyai yokba nisungtem teka tazüing meyipa yok. Iba jagi David jashidaktsü aser pai Nabaler kibong aser pa akaba ajak tananep tashi nungbo ajak samatsütsü apuso. Iba osangji Nabal kinüngtsü Abigaili angashia, lai yakta dang Davider telok asoshi amtsük, shi aser yi teperi bener par kidang alirtem jelia yoker la dena apuso. Davidi par kibong nung jabaso kata anünga meyutsüi tepsettsü mulungteter aruba osangji lai meteta liasü. Ajisüaka, pa kinüngoiboi mashimaluba mechi la taküm samatsübbajia lai mapayu. La asoshi rongdak nungdakji la taküm masü lar kibong rangben kümzüksübbajia liasü. Aji oda, kodang lai David ajuru, lai pa tsüngdang tejak mechioker ali nung apudak aser la kinüngoiboi matumalem o jembiba atema taidok meshi. Nabali David-ji Tsüngremi mezüja shimtetba nisung ta memetet saka Abigail-ibo David den Tsüngrem adenbaji meteta liasü. Aji oda, Abigaili David ket nungi par kibong ajunga kümzükbajia tashiji tulu liasü. Davidi Abigail dang ashi, "na ilunga maru asübo, nü dak tamajung inyaktsü aliba nungi shibai ni sotla?" Ibaji kanga tetsübuttsü aser yimli o liasü. Iba ama lendong nungi tetsü kati kibong ajunga kümzükbajia tashiji kecha dena medemdangtsü makok. Tanüa Hannah aser Abigail amaji Tsüngrem aser nisungi ma ta meshitettsüsa sarasademba aser inyakba ojalatem aika lir. Item jagi pei chinurtem aser kinüngbutem mashimalu aser mazüokba ajanga kibong ajunga samatsüba nungi kümzüker. Item ojalatem nüng sanga tanü tetsü temeim anogo amonger.

OLEMSABANG

Asenoki meyokteba jembiba Ojang karh

T. Meren Paul, Kohima


(Yashi adok nungi...)

54. Tsüngdenkoden -Tetsüng teben tabensa shidak tentetyim
Jaksübangsü -Tejak tebang, tenuk telen tereprangtsü shidak tentet yim
Sorobangro - Nisung pa temang rangben tereprangtsu tajetettsü aketbadem, asojen
Jaklaliro -Nisung ka libaliro shisatsü, inyaksangshi jembishinü yimya
Olaosü - Nisung ka bang nungi adokba ola tangatsüren
55. Bangjemtep - Telok ajak mulungtepa telemtetba agiba
Bangsentep - Obang mapu hai haura maka asatepba
56. Otaori -Züngzünger masü, yimpazümalem, süoki mai
Nübanüyim- Anüalem, menumeyanga temulung magütsü yangzüba
57. Kilamet - Teburi tangar kinüngtsü den nüktabangtaba met
Kijung arak - Tebur/Tetsüri tangar kinüngtsü/Kinüngbu rakzüka agiba
58. Alaashi -Timtem ajurupa mapang teyariteper mali keja rokrongba
Tetlatetshi - Nisung ka indang tenüng menük, nüngsenbangsen jembitsüba
59. Anüdoklen tip-Anü adoklen anütsüng asetketa atulen sayep, south
Anülulen tip - Anjong tenari sülen anü talulen anütsüng asetzüka alulen sayep, north
60. Nükdong- Temang nung teret ana loktepdak wakteta adoka aliba
Nükti - Süngkum, Moji, kümbok lanu nung wakup adokaala amentetba radangdak
61. Terangrang - Tashi tait tinyaknü, tani tebelem majeteter
Teyakyak - Inyaksangshi tayin, tekara
62. Atakadem-Tesembari nisung ka dak tamajung atalokdakjang ta jazüktsüba.
Tsünüonü -Tangari tenüng onsara ateta tetshitsüba agi yaretkongretba
Amoashi - Nisung tangula sakluktsüba metizüki kinü tanur shirangba, süngjanglijang teben shizüka aoba
63. Müzü -Tokolak nung totzü anüba, shi nung metsü müzüba, tutua amshira müzü tasütsü
Nüro - Kümo nung mozü anüba, tejak nung cream anüba, tera amshira Nürotasütsü
Atih - Tejak nung ponak teber aliba dang ponak atih ta ajar
64. Sowar -Nüjinülem nisung masü, kecha memetet mashi malu, mabensa nisung
Yiar -Nüji nisung tokolok meshidaki kuma aoba
65. Matamalem -Shisatsü mabensa nisung, tepatepa inyaker
Metamelem -Tamakitsü O jempiba, salepsaria mesüshiba
66. Tenari - Tobolong telong tentetba, narinari, tat- naring, polong, anglong, circular Telonglong -Longlonglonglonger, tebolong masü tejoklang, tat- süngkum, spherical
67. Milak -Süng nungi jangruba mi talak tatsük metangshiyonga aronger, flame Misem - Jangrua aliba mijang tatsük saka metangshira maronger, ember
68. Pangnangshinang - Chiyungtsütapu ajak tebang dang tajung chitetba
Chinüyungnü - Tenük agi anguba chiyungtsü ajak chinüa jemnüa jangruba
69. Yimpazümalem - Yangzüa temulung magutsü, yimdangi marui kazüba, Anüalem - Yimya tepezü, meyakyak
70. Mayakoya - Maksütsü, taktsü O kazüka yokba, obscene
Yapuyanü-Mangmangkoria tangar atetapongatim masüba o jembiba
71. Nongnang - Shidak masü ta atidakba, nongah ta rata-a bilemba, doubt
Atsüayong - Arendaka atasaa aliba, inyaktsü kanga jangrabangrabo maliba, hesitate
72. Longkak -Atsüa maro, sükia atapesaba
Konem -Shisatsü kanga telung, tangari ashiba yakta makizükla
Tesükih - Saklibangli, kumli adok temela
73. Kitong -Yimdak apuani anaprongla tabensa telidak ki, family
Kilen - Yimdak nisung aliba ki kaka shia züngokba, household
Kidong - Tebou ka nungi jakzüka aruba tarensen, tat - Jamir, Longkumer; clansman
Kimang - Sosemdangsem kinungerdem, kindred
74. Tenepruh -Merakmerakalireptsüka inyaksangshiba
Tenendak - Anepaluyim tajung, mapa nung temulung tagütsü
Teinyaknü - Mapa inyaktsü azümesen maket
Tekumdang - Mapa meranga yakyak-a inyaktetba
75. Towaro - Tereprangtsü nung techanu, yangyang yangyanger
Towaer - Temulung sadoka anasai marutet kümdaktsüba, merenokba
76. Tejepjep - Nemnemshinemba, nüngsenbangsen jembiba
Tejahjah - Tanen makai dang O jembidena aliba

(Maneni asüng adok nungi...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Taoba mapang pastor aser kaketzülur, Frank Damazio süogo



Frank Damazio

May 10, 2025: Portland, Oregon nung aliba Mannahouse Church (taoba mapang City Bible Church) nung mapang talangka pastor inyaksang aser kaketzülur, Frank Damazio alima nungi pilaogo; pa arrshi küm 75 liasü. Mannahouse Church-i Facebook Post ka ajanga, "Onoki meima aliba taoba mapang pastor, Frank Damazio alima nungi pilaogo," ta metetdaksü. Arogoisa, "Dr. Frank Damazio-i iba Arogo nung küm 25 tashi senior pastor inyakba den külemi Portland Bible College nung tesayur aser Tir inyak. Pai akümlü mapang nung süngjang tajung tangdaksüogo aser pa ajanga alima tesem balala nung Arogotem, lenirtem aser ministry balala nung temelenshi adokdaksüogo," ta metetdaksü. Portland Bible College-ia social media ajanga, "Damazio ya tangatetba aliba nisung ka liasü. Pastor Frank ya tanela tsütsü tebu ka, mangdang aliba lenir ka aser tangatetba tajung aliba nisung ka liasü. Pa ajanga nisung aika taküm nung temelenshi bener arutsüogo. Pa tamang jenjang manokshiba taküm ka liasü, ajemalu aser Yisu bendanga tenzükba lenir ka liasü," ta metetdaksü.

"Tang par kibongi mangyimba mapang nung pa kinüngtsü Sharon den par kibong rangben atema sarasademjang. Pa ya temeim kinüngbu ka, tebu ka, tebou ka aser pastor ka liasü," ta Portland Bible College-isa metetdaksü. Damazio-i küm 40 dak tema Tsüngrem tenzükba wadang balala nung nokdaka liasü. Pai kaket 30 dak tali züluogo aser pai züluba kakettemji teimbaka Khristan lenisüba aser Arogo ketdangsüba dak sendakba kakettem liasü. Pastor Damazio ajanga nisung aika taküm nung kongshi aser parnok rongnung taoba mapang Mannahouse Church nung youth pastor Benjamin Windle densema lir. Benjamin Windle küm 22 asüba mapang nung pai Pastor Damazio ajurua liasü. Windle-i Facebook post ka ajanga, "Ni arrshi küm 22 asüba mapang nung Central Oregon nung ayongzükba youth camp ka nung aden. Iba mapang nungji Pastor Frank Damazio-i Cindi küna dang pa den külemi Youth Pastors ama inyaksü asüngdanga liasü. Anungji künnati Australia toktsür Portland-i arua City Bible Church / Mannahouse nung tenzük," ta metetdaksü.

Chhattisgarh nung anti-conversion ozüing tesashiba benoktsü

May 10, 2025: Anogo ishika tejaklen Chhattisgarh Chief Minister, Vishnu Deo Sai-i pai aniba sorkari state nung tamangba yimsü meyipdaksüba nokdangtsü atema ano ozüing tesashiba ka benoktsü, ta metetdaksüogo. Interview ka nung jembidang Sai-i, "Chhattisgarh nung ozüing alema tamangba yimsü meyipdaksüba nokdangtsü atema ozüing lir, ajisüaka iba ozüing ya ano tesashiba akümtsü nüngdaker. Onoki tanga state tem nung aliba anti-conversion ozüngtem-a shisadangdar. Yimsü meyipdaksüba anendaksütsü atema onoki ozüing tesashiba benoktsü," ta metetdaksü. Iba dak alia Sai-i tanga yimsü dangi meyiper tribal nisungtembo Scheduled Tribe (ST) category nungi agientsü aser sorkari teyari balala magütsütsü, ta metetdaksü. "Tribal nisung kati tanga yimsü dangi meyipaka parnok nem maneni ST nisungtem nem agütsüba teyari agütsür. Scheduled Caste nisungtem tanga yimsü dangi meyipra parnok nem ST category kübok teyari balala magütsütsü atema linük temzüng nung shia lir," ta Chief Minister-isa metetdaksü. Tanga yimsü dangi meyiper tribal nem item ama teyari magütsüra ibaji ajanga tribal nisungtemi tanga yimsü dangi meyipba anentsü, ta pai ashi. "Tanga yimsü dangi meyipba nungji kecha timtem mali, ajisüaka nisung karibo talisa sensakertem mesüzüka mesüra shisaliok aser tanga teyari balala agütsütsü ta nangzüka yimsü meyipdaksür. Iba ya tai ta ni bilemer, anungji iba ya anenadoktsüla," ta pai ashi. Chhattisgarh state kübok Bastar aser Surguja regions nung tribal nisungtemi Khristan yimsü mesüra tanga yimsü dangi meyipertem ST category nungi agientsüla, ta akhanger. Taküm March 18 nü Chhattisgarh state Assembly senden nung Home Minister Vijay Sharma-i, state nung ozüing alema yimsü meyipba nokdangtsü atema kobi melii sorkari ozüing tesashi ka benoktsü, ta metetdakja liasü.

BJP MLA, Ajay Chandrakar-i, tai maket nüburtem aser sensakertem mesüzüka tanga yimsü dangi meyipdaksütsü atema shirang aneptsüba sentongtem agir, ta metetdakja liasü. Chandrakar-isa, health, shisaliok aser social work atema tentetba melungtet teloktemi bendanglen nungi senotsü teyari angur aser senotsüji amshia yimsü meyipdaksüba sentongtem nung amshir, ta tai tonglokja liasü. Evangelical Fellowship of India (EFI)-i ashiba agi, 2024 küm Chhattisgarh nung Khristantem anema inyakba tatalokba 150 liasü. State nung Khristantem dak azükba, loktiliba nungi sendokba, yimdak nungi meyindokba, rongsenkettzüng dak sendakba maongka magütsüba aser Hindu nunger külem-küja nung kangshia shilem agidaksüba densema liasü. Nütsüng million 30 aliba Chhattisgarh state nung nütsüng shilem 2 dang Khristantem lir aser nütsüng shilem 30 shi tribal nisungtem lir.

OJALA TEM NEM TETUSHI “Ya Ni Asola Ojala”

Ojala rongsen tulubaji Temeim aser tashi tulubaji Sarasadem. Kodaker Tebui menürema “Teyarir Tetemsüla” ta naroküm jaloktsü Ojala wainshin agi obala mulung sünepdaksür Aser asen ki teti wangwawangwanga lidaksür Azülong nungi tebenjem atura tashi tonga mesütet, Anünglak tonga sapisayangteta penzüa senzür Aser molotzü ponglang tashi lua senti perem bushiteter Nai yarem süa tenük melentepi anealuba chirtema ni ! Teroto anü medem ojala alidak tesem ajakji perangpanga alir. Lar kilemi arur temoa ni, lai Yisu temeim indang shia sarasademsür. Tamangdir tasü tait ojala, Lanlia ! tajung Tsüngremi moajang.

~ Talizulu Ozükum, Dimapur.

ANOGO ABEN TSÜNGREM DEN

TEKÜMDANG SHISATSÜ

Tekümdang nisungi pei shisatsü miimbanger, saka tamashir mulungi parnok tamashiba sangdonger. ~ Apijemtsü 12:23 Maparen ajak nung kanga kümdanga aser shisadanga sentong atonga inyak nung dang timtem aser lendong balala nungi jenbua kümzüker. Apijemtsü 22:3 ashir, Tekümdang nisungi lendong angur aser atsükadoker, saka tongmelangeri odang aoer, aser tim-atemer. Asenoki teti jembiba o kaji pabo mes?ra labo kanga tekümdang anungji mashi-mashi jembia meinyaksü. Tekümdang nisung dak temulung alemer kechiaser pa/la dak tangatetba shisatsü aliba agi maparen ajak tesüngjem nung tangar meyrudaksüi jembir aser inyaker. Saka tamashi shisatsü ateneri aiben tarutsü indang meshisadangi bilemer, jembir aser inyaker. Tamashi nisungi tila ka metetbaji tulu ka ama bilemer aser yamaji inyaksangshir iba sülen lendong,khuret balala arur aser pei taküm, kibong aser lokti nung tebilemtsü adokdaksür. Apijemtsü 14:16 ashir, Shisa akari kümdanger, aser temenen nungi pilar, saka tamashiri pei sasa dak tashishitsü ketdaksür. Tanü asen putu kechi mapa aser inyaksangshi nung südir süaka kanga shisa ka-a kümdanga alitsü onsara nüngdaka k?mogo. Tamashi nisungi tamajungba nem kokdakja tashishitsü ketdakja aliba ama masü, saka kümdanga tai lenmang ajak paidoka jajar tamanger küma alitsü merangdi.

AO OSHI ANGAZÜKDAK:**TANÜ ANGAZÜKTSÜBA OJANG****Temokong**

(adj) tatsük masü, asükba (cold)

* Kohima ya temokong tesem ka lir.

Temoktemnü

(n) ajungbena ola balala adoka angashiba, temenen mapa (commotion cause by spirit)

* Temoktemnü agi nisung ajak aoksateper ajen.



Tir Yimyim

OLONG PAITEP # 7147

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

1. Nisung jenti
4. Tsük rudenba
6. Temzüng tesashi
8. S___i
9. Nisung rongnung telemasa
10. Anogoshi
12. Ajanga aor
13. Tsük rizüngdak
14. Tebang nungi adokba
16. Süngdong tatembangtiba
17. Meputep

- (5)

- (5)

- (5)

- (3)

- (3)

- (4)

- (4)

- (3)

- (3)

- (5)

- (5)

LANGTSÜNGLEN

1. Tenük telong
2. Committee dang ajar
3. Yagi ki okdoker
5. Yim lenmang
7. Temoatsü keter meyipa aruba
11. Kanga junga menemba
12. Kenyongi majinü
13. Rong kanga tulu

- (9)

- (5)

- (7)

- (5)

- (9)

- (7)

- (5)

- (5)

OLONG PAITEP # 7146 TELANGZÜBA**TIPIEN :**

3. Alizüng, 5. Jahaz,
6. Obang, 8. Liku, 9. Medemer,
14. Wain, 16. Yimra, 17. Arogo,
18. Osemlok.

LANGTSÜNGLEN :

1. Ojang, 2. Shilem, 4. Zübu,
7. Nao, 10. Renlok, 11. Tai,
12. Molok, 13. Arem, 15. Alak.

NAI-A YA METETTER MA**Mother's Day nung sen teimtiba endokba:**

Record: 2023 küm American consumers-i \$35.7 billion endok.

Osang agütsür: National Retail Federation (NRF).

Tongtipang sen endokba: Flowers, gifts, and special outings.

Jenang tasaktem: Jewelry, special outings, and electronics.



Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

1. Tenüing :
2. Tasoba anogo:
3. Küm : 4. Class :
5. School :
6. Talidak :
7. Salem osang :

Tepela
Tasoba Anogo

**Guwahati nung yipru tulu ka süia teraksa aika bentsür aruogo****Guwahati, May 10, 2025**

(Agencies): Guwahati nung May 10 nikongdang yipru aita tzünglu kanga aru aser iba ajanga teraksa jenti bentsür aruogo.

Yipru ajanga süngdong aika laodaktsü, streetlights raksatsü aser gari aika raksatsüogo.

GS Road dena Guwahati nung tongtipang lenmangtem tzü

mobangba agi traffic timtem tulu ajuru. Tesem aika nung senzusenbongertem ghonda aika lenmang nung anendaka alitsüsa aküm.

Social media sabang aika nung video prokshiba nung yipru tesashi süiba angur aser nisungtem kanga aoksatepba osangtem prokshir.

Maneni, yipru ajanga

Guwahati kübok tesem aika nung electricity supply nung timtem agütsü. Yipru süiba sülen ghonda aika electricity mengui timtema liasü.

Guwahati nung ketdangsürtemi teraksa anguba indang official estimate ano mesangdong lir aser parnok den külemi emergency services-i mapa inyakdar.

India-Bangladesh arrtsülen tensa junga dang lir: CM Sarma**Guwahati, May 10, 2025**

(Agencies): Assam nung India-Bangladesh arrtsülen tensa tiptema dang lir aser tesüiba anogo 10 tsüngda tatalokba osang kecha mali ta Chief Minister Himanta Biswa Sarma-i ashi. Arrtsü kanga junga anüktsü aser ozüing alema arurtem noktangtsü atema border patrolling akangshiogo ta pai ashi.

"Taoba anogo 10 tsüngda arrtsülen tensa süngjema dang lia arur saka patrolling akangshiogo. Iba atema Centre sorkari osang tejangjaba agütsütettsü kechiyong parnoki security mechanism balaka

inyaker" ta CM Sarma-isa ashi.

Ketdangsürtemi ozüing alema arurtem apur aser Assam sorkari parnok linük telung maitdaksütsü atema ozüing takang yanglua lir ta paisa shisem.

"Ozüing alema arurtem arrtsü nung dang parnok linüki meyipa yoker. Onoki ozüing mapa metenzüktsü mesüra parnok India lushii anir marutsü saka indangindanga Bangladesh-i meyipa yoktsü" ta Sarma-isa metetdaksü.

Centre sorkari India kübok tesem balala nungi Rohingya nunger dena ozüing alema arur aika meyipa yokogo. Goalpara

district kübok Matia detention centre nung alirtem dena meyipa yokogo ta pai ashi.

Bendangertem ta maittsü jangjartem Bangladesh-i meyipa yokogo. Tang Matia detention centre nung nisung 30-40 shi ka dang anünga lir, ta Sarma-isa metetdaksü.

India nung detention centres tulutiba rongnung Matia ya ka lir aser iba nung ozüing alema arurtem puoka ayur.

Taküm February ita Supreme Court-i Assam sorkar dang iba facility nung puoka ayur bendanger 63 meyipa yoktsü atema mapa tenzüktsü tetuyuba agüja liasü.

Manipur Governor-i armed forces pusema cross-party senden amen**Imphal, May 10, 2025**

(Agencies): Manipur Governor Ajay Kumar Bhalla-i Honibarnü Raj Bhavan Conference Hall nung high-level senden ka ayonga amen.

Pakistan den arrtsülen tensa mejungi aliba mapang Indian Armed Forces pusema nungittsü atema Governor Bhalla-i iba senden ayonga amen.

Iba senden nung Manipur nung political party balala nungi tanishirtem aden aser parnok ajaki linük aser arrtsülen sepaitem pusema nungittsü bangjemtep.

Iba senden nung Aam Aadmi

Party (AAP), Bharatiya Janata Party (BJP), Bahujan Samaj Party (BSP), Communist Party of India (CPI), Communist Party of India (Marxist), Indian National Congress (INC), Janata Dal (United), National People's Party (NPP), Naga People's Front (NPF), aser Republican Party of India - Athawale (RPI-A) nungi tanishirtem aden.

"Iba senden ajanga asen nübortem longjema aliba tangatetba kuli agütsür. Asen tanishirtemi tasütait sepaitem pusema ola ka dang adoker" ta Governor Bhalla-i ashi.

Senden nungsa Manipur Director General of Police Rajiv Singh, Secretary to the Governor Sumant Singh, General Officer Commanding 57 Mountain Division Major General S.S. Kartikeya aser tongti ketdangsürtem aden.

Major General Kartikeya-i arrtsülen ajurua aliba tensa indang osang tejangja lemsatop. Paisa India-i mapa inyakba aser maparen renema aliba indang ashi.

Political party balala nungi tanishirtemi Prime Minister Narendra Modi lenistüba atema tenüngsang agütsü.

Israel-i Gaza kübok tesem balala amak; nisung aika tepset



Gaza yimti nung Israel nung sepaitemi drone amshia amakba mapang yiruba nisung ka anir aoba noksa nung angur.

Gaza City, Monupii/May 10

(Agencies): Israel-i Gaza nem tenokdangba agütsür ita ka dak tema aruba mapang Honibarnü Gaza Strip nung tanur asem densema nisung tenet tepsetogo.

Palestinian news agency Wafa-i ashiba agi, Israel nung indang rara dang amshiba tayimtsü kati Honibar anepdang Gaza City kübok Sabra kiyong nung süki ka nung bomb pokloktsüba sülen Tlaib'er kinunger nisung pongu tespet.

"Tanur asem, tetsü aser la kinungbo süki ka nung mejanga aliba mapang Israel nung tayimtsü kati bomb pokloktsü," ta par kinunger Omar Abu al-Kass-i AFP news Agency dang ashi.

Jelia tekümdangtsü memetetdaksüi aser kecha

aibelen mali sünnung iba tesem amak, ta Abu al-Kass-i ashi, shiba tanurtem tobou lir.

Kasa mapang nung ano Gaza City nungsa Tuffah kiyong drone amshia amakba mapang nisung ka tepsetogo.

Maneni Wafa sangdong ajanga ashiba agi, Israel nung indang gunboat temi Rafah tzüküm nung injang khaloktsüba sülen Mohammed Saeed al-Bardawil tepsetogo. Rafah anüolen al-Mawasi humanitarian zone nunga Israel nung sepaitemi civilian ana yirutsüogo.

Taoba ghonda 24 tsüingda Israel-i Gaza Strip kübok tesem balala amakba mapang Palestine nung 23 tepsetogo aser nisung 124 yiruja liasü.

Israel-i March 2 nü nungi tenzüka Gaza-i osettsüt kecha meyoktsü atema tenokdangba

agütsür aliba mapang tang tesem balala makdar. Gaza nung alir nisung million 2.3 ya teyari agütsürtem dak metaloker lir shirnok inyaksangshi shibangayonga odor, kechiyong chiyongtsü agi kanga anünga kümдар.

Central Gaza kübok Deir el-Balah nungi Al Jazeera osangbener Hind Khoudary-i ashiba agi, chiyongtsü agi kanga anünga kümogo. Bakery tem, distribution point tem shibangogo aser chiyongtsü agütsüba kitchen kar dang inyaksangshidar.

Khoudary-i ashiba agi, nüburtem ghonda aika atar saka aiben teka tazüing dang aoer aser item kitchen tem yagi taoba mapang nisung 100 mesüa aliba chiyongtsü nisung 2000 tashi nem agütsüdar.

Ceasefire benokra Ukraine dangi hadir balala yokba anena atatsüla: Peskov



Moscow, Monupii/May 10

(Agencies): Ceasefire benokra US aser Europe nung linüktem nungi Ukraine dangi prangbong injang aser tanga hadir balala bener yokba anena atatsüla, ta Kremlin otongdar Dmitry Peskov-i ABC News den sensaksema mapang ashi.

"Ajita mesüra Ukraine tali ajangzüksü. Ukraine-i parnok sepaitem anidena sepai tasentem raraba tesemi anir arutsü," ta Peskov-i ashi.

"Ukraine-i iba mapang ya sepai tasentem nem training agütsütsü asoshi amshitsü aser tang rara aliba

U.S. tir Donald Trump-i Hokolbarnü Russia aser Ukraine na dang iba rara ya anentsü mepeshia metetdaksüogo. Pai anogo 30 nü atema ceasefire benoktsü nongshidar, koba agizüktsü Ukraine renema lir.

Ajisüaka Peskov-i sensaksem nung ashiba agi, "tir Putin-i ceasefire ka pusemogo, saka pai tasüingdangba aika asüingdangogo. Pai ashiba agi tang raraba tesem nung aika atalokdar aser Russia nung sepaitem tejakdangi kanga temulunglemteta odor."

"Anungji onoki ceasefire indang jembira United States aser Europe nung aliba linüktem nungi anogoshia prangbong

injang aser hadir balala aruba indang ya koma asütsü?" ta pai asüingdanga liasü.

Pa olen ajanga March tom nungi ceasefire dak sendakba nung Russia jenjang masetshi-i aliba sayur. Iba mapang Trump-i joko ceasefire benoktsü atema Russia matatetba sayuogo aser Putin-i pa anisar asü ta ashishio.

Peskov-i iba ya magizük aser ashiba agi, indang indanga sensaksemsü atema Ukraine-i memulunger ta ashi.

"Tebilemtsü benttetsü aser yimjung aser sensaksem ajanga ken o benttetsü atema tir Putin-i takokba tashi inykdar, ajisüaka lenmang kecha mali asünung onoki maneni military operation benoka inyaker," ta pai ashi.

Putin-i taoba ita Easter mapang mapang tatsüka asoshi ceasefire benokba sangdonga liasü aser ano alima rara tanabuba nung takok anguba benjungba mapang anogo asem atema ceasefire benoktsü sangdonga liasü. Ajisüaka iba yabo Ukraine-i magizük aser ashiba agi parnoki anogo 30 atema ceasefire benokner.

OFFICE OF THE
CHUCHUYIMLANG MERÜSHIBA AOTSÜR TELONGJEM KOHIMA

TENÜNGSANG AGÜTSÜR

Asür IMNACHUBA jala **TIAWAPANGLA-i** Department of Higher Education kübok Assistant Professor (English) B.ed. college nung mapa anguba atema MERÜshiba AOTSÜR TELONGJEM, KOHIMA ajanga tenüngsang agütsür.

Tsüngremi la taküm aser wadang maneni moajangma.

Sd/-
Mrs. ALEMPOKLA
(President)

Sd/-
Mrs. IMKONGMENLA
(Secretary)

OFFICE OF THE
ASANGMA SENSO TELONGJEM MEDZIPHEMA
CHUMUKIDIMA, NAGALAND.

KHONANG TETUSHI AGÜTSÜR



Wb. K.Imlionen Longkumer aser Wt. Sakurepla Imsong jala **Kr. Sungjeminla Longkumer-i** Department of Economics, Nagaland University, Lumami kübok "Capital Formation in Agriculture: A case study of Peren, Dimapur Districts of Nagaland". Shisaluyimba nungi Doctor of Philosophy in Economics (Ph.D) takok nguteta tenüng tajung bener arutsüogo.

Asangma Senso Telongjem Medziphema (ASTM) mendenti ajanga jala Dr. Sungjeminla Longkumer nem khonang tetushi agütsür.

Tsüngremi la taküm aser wadang maneni moajangma.

Sd/-
I. Mar Imsong
President (ASTM)

Sd/-
C. Imti Pongen
General Secretary (ASTM)

Port Sudan mepetmesü tulu nung lir

Port Sudan, Monupii/May 10

(Agencies): Red Sea nung amendaka aliba Port Sudan yimti hopta ka shi anüing ajanga amakba sülen mepetmesü tulu nung lir.

Sudan nung civil war tenzüker rara arudang mapang ka nungbo Port Sudan ya ajak asoshi tejenokdak ka liasü, saka tang Rapid Support Forces (RSF)-i anogo aika maka arudar.

Drone amshia iba yimti anogo trok amakba sülen fuel depots asem nungi maneni mokozi adokdar, koba RSF puri maka liasü. Item tesemtemi teküzmükertem yokogo, ajisüaka parnoki mi metemsepteti arudar.

Küm ana tejakdang RSF aser army lenirtem tsüingda tashitoktepba ajanga iba rara tenzüka sülen iba ajanga alima nung humanitarian crises tulutiba adokdaksüogo aser nisung million 12 dak tema pei talidak ki toktsür jenshia aotsüsa kümogo.

Port Sudan nung alir arishi küm 26 tain Mutasim-i ashiba agi, tenüngdakba osettem agi anünga kümogo. Totsü ayudak apokba ajanga Port Sudan nung tzü atsütsü atema pump tem

atema diesel maka kümogo.

Mutasim-i BBC dang ashiba agi, anogo ka atema tzü ya hopta ka tejakdang Sudanese pounds 2,000 liasü, saka tangbo ponguben agi timba meshir.

Iba ajanga pa aser par kinunger parnok tenet sorchioktsü, merkejetsü aser tzü chikotsü atema tzüing agi kanga anüingdaksür, ta pai ashi.

"Yakta onoki tzü malitetsü," ta pai ashiba den pai shishilembadak oset alia ayokba ajanga sen aazüker ta ashi.

Port Sudan nung tzü tebilemtsü dang masü saka tanga tebilemtsü aika adoker lir.

Anogoshia inyakyimtem aki ama inyaksangshidar, saka yimti nung totzü agi anünger aser petrol stations tem nung garitem aika anendena lir.

Iba tia tensa ya Sudan nung aikati ajangshio, saka iba yimti nungbo majangshi liasü.

Tapba hopta tashibo Port Sudan nung nüburtem aonunga yimti yimtong nung senzüeteta liasü aser linük kübok rara agi mekongshiba tesem rongnung ka ta züingshia aruogo, saka hopta ka tsüingda iba ya melenshia tang mepetmesü tulu nung lir.

Kichutip Sporting Assoc-i under-15 Nagaland Open Futsal Tournament ayonger 1ST-3RD JULY MUJABI FUTSAL TURF MOKOKCHUNG NUNG ASAYATSÜ



Kichutip Sporting Association, Mokokchung ketdangsürtemi aruya aliba Nagaland Open Futsal Tournament dak sentakba nung osangbener senden ayongba mapang tangokba noksa nung angur. Mokokchung, 10 May, 2025.

Mokokchung, 10 May (TYO): Mokokchung town nung aliba Kichutip Sporting Association (KSA)-i taküm mezüngbuba arishi küm 15 tekübok pur asoshi Nagaland Open Futsal Tournament 2025 "rise up" omen dak rangloker Mujabi Futsal Turf, Salangtem ward, Mokokchung nung anogo asem 1st - 3rd July, 2025 tashi ayongzüksü renemdaki, ta KSA Tir, Imtichiba Kichu-i Arok Salang Kichutip nung osangbener senden ka nung jembidang metetdaksü.

Kichutip Sporting Association tenzüker 2023 küm Silver Jubilee amungdang, lanurtem saisabong tsütsü tangar menepa adoktsütsü nükla yur mapatong kar tenzüksü jubilee bangzüng renema ayu. Ibaji mapa küma iba sentong ya lanur dak rangloker ayongtsü bangjemtep, ta Futsal Tournament Convenor, Tinukaba-i metetdaksü. 1st - 3rd July ya school tanurtem mei sodi apir shimba lir.

Reprangdangra taintem asayatsü atemabo sabang karbo lir, saka lanurtem atemabo

asayamung ya kanga apara, iyongji, parnok nem sabang lapokja tang asoshi under 15 dak rangloker akar, saka meilongi ano under 13 mesüra iba tekübokjia ayongtsü tebilemba lir, ta Convenor-isa inyaka aotsü sentong kar lemsatep. Iba asayamung ya Mokokchung District Football Association aküm kübok agitsüba lir, ta paisa shisem.

Iba asayamung nung senpet sen ajak senteper ? 80,000/- (eighty thousand) lir. Takoker mezüngbuba, tanabuba aser semifinal tashi atonger ana den ano nija senpet kar shima senpettsütsü. Iba asayamung nung telok balala den kija/ kibongtemi teyari balala agüja shilem agitsüba lir, ta parnokisa metetdaksü.

Tsükdakradang kecha majurura tarutsü nung iba asayamung ya "running trophy" ka amai kümshi ayongtsü tejangraba lir. Tang ayongtsü aliba asayamung nung ya Mokokchung nungi dang masü tanga district nungia team karbo arutsü imladar, ta parnokisa shisem.

1998 küm Kichutip Sporting Association tenzüker küm 27 shi arudang saisabong luyim tsütsü takok anguba aika lir, item rongnung KSA züngsem karibo National aser International level tongteta shilem agiba otsü tejangja lir.

Iba asayamung nung shilem agitsü jangrartemi item tesem nungi form agizüksü akok - Aor Coffee (3rd Floor MCCI building, Arkong ward), Fix Your Fixation (Arkong Ward, Yongpang Market anasa), Mokokchung Sports Store (MMC Shopping Mall anasa) aser G-Sports (Magnus Hotel anasa).

Registration fee senpak 2000/- alitsü aser form meyiptsütsü tatembang anogoji 15th June, 2025 asütsü. Osang tajung kaji 2010 January 1 sür tema asortembo iba asayamung nung shilem agitettsü, ta tayongertemi metetdaksüogo. Kari danga asayamung dak sentakba osangtsüsang tejangjaba metetnura iba mobile No. 6009033578/9615115795 ajanga tayongertem den jembitettsü.

Taoba Australia coach Arnold Iraq football team coach kümogo

Monupii/May 10, 2025 (Agencies): Taoba mapang Australia manager Graham Arnold, Iraq football team coach asütsü shimba linük football federation-i metetdaksüogo.

South Korea aser Jordan na den taruba ita World Cup qualifiers masaya tsünga iba jenjang ya agiogo.

Arnold shimba osang ya Iraq Football Association-i social media ajanga sangdonga liasü. Arishi küm 61 tain coach ya IFA nungi ketdangsürtemi Baghdad nung agizükba indang noksa ka dena lemsatepogo.

"Iraq national team head coach asütsü Graham Arnold shimba pelashishia sangdonger," ta federation-i Instagram nung post ka nung shia lir.

Arnold-i Spain nunger Jesus Casas melenogo, shiba 2026

World Cup atema Asia qualifiers tasembuba round nung March ita Palestine goal 2-1 agi makokba sülen mapa nungi anenja liasü.

Iba asaya makokba sülen Iraq team Group B nung tasembuba jenjang nung lir aser parnoki temaba jenjang nung aliba South Korea point pezü aser Jordan point ka agi memenepi lir.

Asia nung qualifying group asem nungi temaba jenjang nung tembangba team anana World Cup atema qualify asütsü aser tasembuba aser pezüba nung tembangba team tem ano round ka asayatsü.

Arnold lenisüba nung Iraq team mezüngbuba asaya June 5 nü Basra nung South Korean den asayatsü aser iba sülen anogo pongu lir Amman nung oa Jordan den asayatsü. 1986 küm

sülen tang mezüngbuba World Cup atema qualify asütsü asoshi Iraq team merangdar.

Australia indang head coach mapa toktsüba sülen ita tenet lir Arnold tanaben international football asaya nung tetsüng ajemokogo

Arnold lenisüba nung Australia team 2022 World Cup nung knockout round tonga atu. Pa lenisüba nung team küm trok asaya saka tang qualifying nung par team-i Bahrain makokba den Indonesia den draw asüba sülen pai mapa tokja liasü.

Pa meleno taoba mapang Western Sydney Wanderers coach Tony Popovic shim, aser pa lenisüba nung Australia team Asia qualifiers Group C nung tang tanabuba jenjang nung lir. Parnok June ita Japan aser Saudi Arabia na den asayatsü lir.

Archery World Cup Stage 2: Madhura-i gold medal angu

Monupii/May 10, 2025 (Agencies): Archery World Cup Stage 2 nung Honibarnü India tsür Madhura Dhamangaonkari finla nung USA tsür Carson Krahe 139-138 agi koka tang mezüngbuba gold medal ka nguogo.

Madhura, shiba World Archery rankings nung unranked asayar ka lir, lai set tasembuba nung seven nung khi khashiba sülen la 81-85 agi tesülen liasü. La ya küm asem tashi international level nung metoktepba ajanga World Archery rankings-i maiti liasü.

Ajisüaka arishi küm 24 tain asayar yagi pressure nung kanga süngjemer asaya aser set pezüba nung point ka dang

monugteti kanga junga asaya-a tenaprongla point 110-110 aküm.

Decider asayaba mapang lai maneni kanga süngjemer asaya-a perfect 10s ana angu aser 9 ka ngua Krahe dang nungi point ka agi timba nguteta lai asaya akok.

Honibarnü gold medal anguba densema Madhura-i iba asayamung nung medal asem nguogo. Lai tetsür team asaya nung silver medal angu aser compound mixed team asaya nung Abhishek Verma den bronze medal ka ngua liasü. La küm asem sülen tang mezüngbuba international jenjang nung asayar aser lai kanga junga asayaogo.



Patna, Bihar nung Khelo India Youth Games (KIYG) 2025 asayaba mapang Nagaland Sepaktakraw tebur team-i Regu event nung silver aser Quad aser team event nung bronze medal nguogo. Tang mezüngbuba Nagaland team-i regu event semifinal nung Manipur team kokogo. Parnok final nung Delhi den asaya saka mekoki silver dang angu.

PCB-i Pakistan Super League thinentsüogo

Monupii/May 10, 2025 (Agencies): India aser Pakistan na mangatettep adoker aliba mapang ka nung Pakistan Cricket Board-i Pakistan Super League T20 cricket tournament thinentsüogo.

PCB-i ashiba agi, Pakistan Ato Kilonser Shehbaz Sharif-i tetuyuba agütsüba sülen parnoki iba jenjang agia liasü.

"Cricket asaya ya longjemdaksüba tashi aser tepela bener arutsüba saya ka lir saka khi atema anena atatsüsa akümtsü," ta PCB-i Hokolbar aonung sangdong ka ajanga metetdaksü.

PCB-i taoba mapang, PSL nung tanungba asaya ti ya Dubai, United Arab Emirates nung oa asayatsü ta sangdonga liasü, kechiyong bendanger asayatem aika mesüngjemteti aküm aser parnok kümzüka toktsütsü nüngdaka aküm.

Ajisüaka PSL thinenba-ang sangdongogo aser taküm iba asayamung ya tenzüksü asayatsü masayatsü iba indang osang tejangja magütsü.

Rawalpindi, Multan aser Lahore yimti nung tanungba PSL asayatem ya asayatsü

renemogo.

Brehostibarnü India-i yokba drone ka PSL asaya tenzüksü ghonda ishika dang lia Rawalpindi Cricket Stadium complex telung nung tsük. Iba asaya nung New Zealand, Australia, West Indies, South Africa aser England nungi asayatem shilem agitsü liasü.

PCB mendenbuba Mohsin Naqvi, shiba Pakistan sorkar kübok interior minister lir, pai bendanger cricket asayatem aser PSL franchise kiburtem den senden ka amen aser asayamung ya Dubai-i belener aotsü ta ashi.

England nunger cricketer Sam Billings, New Zealand nunger Colin Munro, South Africa nunger Rilee Rossouw aser West Indies nunger Jason Holder nung taküm PSL nung shilem agia aliba bendanger asayar 43 rongnung densema lir.

PSL ya taküm agi küm 10buba asayar, koba 2016 küm UAE nung tenzüka liasü. UAE nung mezüngbuba asayamung ana ayongzüka asaya aser COVID-19 wara pokteter aliba mapang 2021 küma asaya karbo ayongzüka asayaogo.

BILEMDANGANG

Mapa tila dang süaka bendanga agüja inyakang."